

সর্বহারা

কাজী নজরুল ইসলাম

BANGLADARSHAN.COM

সর্বহারা

ব্যথার সাতার-পানি-ঘেরা
চোরাবালির চর,
ওরে পাগল ! কে বেঁধেছিস
সেই চরে তোর ঘর ?
শূন্যে তড়িৎ দেয় ইশারা,
হাট তুলে দে সর্বহারা,
মেঘ-জননীর অশ্রুধারা
ঝ'রছে মাথার' পর,
দাঁড়িয়ে দূরে ডাকছে মাটি
দুলিয়ে তরু কর॥

২

কন্যারা তোর বন্যাধারায়
কাঁদছে উত্তরোল
ডাক দিয়েছে তাদের আজি
সাগর-মায়ের কোল।
নায়ের মাঝি ! নায়ের মাঝি !
পাল তু'লে তুই দে রে আজি
তুরঙ্গ ঐ তুফান-তাজী
তরঙ্গে খায় দোল।
নায়ের মাঝি ! আর কেন ভাই ?
মায়ার নোঙর তোলা।

৩

ভাঙন-ভরা ভাঙনে তোর
যায় রে বেলা যায়।
মাঝি রে ! দেখ্ কুরঙ্গী তোর
কূলের পানে চায়।
যায় চ'লে ঐ সাথের সাথী
ঘনায় গহন শাঙন-রাতি

মাদুর-ভরা কাঁদন পাতি'

ঘুমুস্ নে আর, হয় !

ঐ কাঁদনের বাঁধন ছেঁড়া

এতই কি রে দায় ?

৪

হীরা-মাণিক চাসনি ক' তুই

চাসনি তো সাত ক্রোর,

একটি ক্ষুদ্র মৃৎপাত্র—

ভরা অভাব তোর,

চাইলি রে ঘুম শান্তি-হরা

একটি ছিন্ন মাদুর-ভরা,

একটি প্রদীপ-আলো-করা

একটু-কুটীর-দোর।

আসল মৃত্যু আসল জরা,

আসল সিঁদেল-চোর।

৫

মাঝি রে তোর নাও ভাসিয়ে

মাটির বুকে চল্ !

শক্তমাটির ঘায়ে হউক

রক্ত পদতল।

প্রলয়-পথিক চ'লবি ফিরি

দ'লবি পাহাড়-কানন-গিরি !

হাঁকছে বাদল, ঘিরি' ঘিরি'

নাচছে সিন্ধুজল।

চল্বে জলের যাত্রী এবার

মাটির বুকে চল॥

কৃষাণের গান

ওঠ রে চাষী জগদ্বাসী ধরু কসে লাঙল।
আমরা মরতে আছি—ভালো করেই মরব এবার চল॥

মোদের উঠান-ভরা শস্য ছিল হাস্য ভরা দেশ
ওই বৈশ্য দেশের দস্যু এসে লাঞ্ছনার নাই শেষ,
ও ভাই লক্ষ হাতে টানছে তারা লক্ষ্মী মায়ের কেশ,
আজ মা-র কাঁদনে লোনা হল সাত সাগরের জল॥

ও ভাই আমরা ছিলাম পরম সুখী, ছিলাম দেশের প্রাণ
তখন গলায় গলায় গান ছিল ভাই, গোলায় গোলায় ধান,
আজ কোথায় বা সে গান গেল ভাই কোথায় সে কৃষাণ ?
ও ভাই মোদের রক্ত জল হয়ে আজ ভরতেছে বোতল।

আজ চারদিক হতে ধনিক বণিক শোষণকারীর জাত
ও ভাই জেঁকের মতন শুষছে রক্ত, কাড়ছে থালার ভাত,
মোর বুকের কাছে মরছে খোকা, নাইকো আমার হাত।
আর সতী মেয়ের বসন কেড়ে খেলছে খেলা খল॥

ও ভাই আমরা মাটির খাঁটি ছেলে দুর্বাদল-শ্যাম,
আর মোদের রূপেই ছড়িয়ে আছেন রাবণ-অরি রাম,
ওই হালের ফলায় শস্য ওঠে, সীতা তাঁরই নাম,
আজ হরছে রাবণ সেই সীতারে—সেই মাঠের ফসল॥

ও ভাই আমরা শহিদ, মাঠের মক্কায় কোরবানি দিই জান।
আর সেই খুনে যে ফলছে ফসল, হরছে তা শয়তান।
আমরা যাই কোথা ভাই, ঘরে আগুন বাইরে যে তুফান !
আজ চারিদিক হতে ঘিরে মারে এজিদ রাজার দল॥

আজ জাগ রে কৃষাণ, সব তো গেছে, কীসের বা আর ভয়,
এই ক্ষুধার জোরেই করব এবার সুধার জগৎ জয়।
ওই বিশ্বজয়ী দস্যুরাজার হয়-কে করব নয়,
ওরে দেখবে এবার সভ্যজগৎ চাষার কত বল॥

শ্রমিকের গান

ওরে ধ্বংস-পথের যাত্রীদল !
ধর হাতুড়ি, তোল্ কাঁধে শাবল ॥

আমরা হাতের সুখে গড়েছি ভাই,
পায়ের সুখে ভাঙব চল।
ধর হাতুড়ি, তোল্ কাঁধে শাবল ॥

ও ভাই আমাদেরই শক্তবলে
পাহাড় টলে তুষার গলে
মরুভূমে সোনার ফসল ফলে রে !

মোরা সিন্ধু মথে এনে সুধা
পাই না ক্ষুধায় বিন্দু জল।
ধর হাতুড়ি, তোল্ কাঁধে শাবল ॥

ও ভাই আমরা কলির কলের কুলি,
কলুর বলদ চক্ষে-ঠুলি
হীরা পেয়ে রাজ-শিরে দিই তুলি রে !

আজ মানবকুলের কালি মেখে
আমরা কালো কুলির দল।
ধর হাতুড়ি, তোল্ কাঁধে শাবল ॥

আমরা পাতাল ফেড়ে খুঁড়ে খনি
আনি ফণীর মাথার মণি,
তাই পেয়ে সব শনি হল ধনী রে !

এবার ফণীমনসার নাগ-নাগিনী
আয় রে গর্জে মার ছোবল !
ধর হাতুড়ি, তোল্ কাঁধে শাবল ॥

যত শ্রমিকে শুষে নিঙড়ে প্রজা
রাজা-উজির মারছে মজা,
আমরা মরি বয়ে তাদের বোঝা রে।

এবার জুজুব দল ওই হুজুর দলে

BANGLADARSHAN.COM

দলবি রে আয় মজুর দল !
ধর হাতুড়ি, তোল্ কাঁধে শাবল ॥

ও ভাই মোদের বলে হতেছে পার,
হুণ্ডা রোজে সপ্ত পাথার,
সাঁতার কেটে জাহাজ কাতার কাতার রে !

তবু মোরাই জনম চলছি ঠেলে
ক্লেশ-পাথরের সাঁতার-জল !
ধর হাতুড়ি, তোল্ কাঁধে শাবল ॥

আজ ছ-মাসের পথ ছ-দিনে যায়
কামান-গোলা, রাজার সিপাই
মোদের শ্রমে মোদেরই সে কৃপায় রে !

ও ভাই মোদের পুণ্যে শূন্যে ওড়ে
ওই ঝুঁড়োদের উড়োকল !
ধর হাতুড়ি, তোল্ কাঁধে শাবল ॥

ও ভাই দালান-বাড়ি আমরা গড়ে
রইনু জনম ধুলায় পড়ে,
বেড়ায় ধনী মোদের ঘাড়ে চড়ে রে !

আমরা চিনির বলদ চিনিনে স্বাদ
চিনি বওয়াই সার কেবল।
ধর হাতুড়ি, তোল্ কাঁধে শাবল ॥

ও ভাই আমরা মায়ের ময়লা ছেলে
কয়লা-খনির বয়লা ঠেলে
যে অগ্নি দিই দিগ্বিদিকে জ্বলে রে !

এবার জ্বালবে জগৎ কয়লা-কাটা
ময়লা কুলির সেই অনল।
ধর হাতুড়ি, তোল্ কাঁধে শাবল ॥

ও ভাই আমাদের কাজ হলে বাসি
আমরা মুটে কল-খালাসি !
ডুবলে তরী মোরাই তুলতে আসি রে !

আমরা বলির মতন দান করে সব

BANGLADARSHAN.COM

পেলাম শেষে পাতাল-তল
ধর হাতুড়ি, তোল্ কাঁধে শাবল॥

মোদের যা ছিল সবই দিইছি ফুঁকে,
এইবারে শেষ কপাল ঠুকে
পড়ব রুখে অত্যাচারীর বুকে রে !

আবার নূতন করে মল্লভূমে
গর্জাবে ভাইদল-মাদল !
ধর হাতুড়ি, তোল্ কাঁধে শাবল॥

ওই শয়তানি চোখ কলের বাতি
নিবিয়ে আয় রে ধ্বংস-সাথি !
ধর হাতিয়ার, সামনে প্রলয়-রাতি রে !
আঁধার-নায়ে চড়বি চল !
ধর হাতুড়ি, তোল্ কাঁধে শাবল॥

কৃষ্ণনগর

২০ মার্চ, ১৩৩২

BANGLADARSHAN.COM

ধীবরদের গান

আমরা নীচে পড়ে রইব না আর
শোন্ রে ও ভাই জেলে,
এবার উঠব রে সব ঠেলে !

ওই বিশ্ব-সভায় উঠল সভায় রে,
ওই মুঠে মজুর হেলে।
এবার উঠব রে সব ঠেলে॥

আজ সবার গায়ে লাগছে ব্যথা
সবাই আজই কইছে কথা রে,
আমরা এমনি মরা, কই নে কিছু
মড়ার লাখি খেলে।
এবার উঠব রে সব ঠেলে॥

আমরা মেঘের ডাকে জেগে উঠে
পানসিতে পাল তুলি।
আমরা ঝড়-তুফানে সাগর-দোলার
নাগরদোলায় দুলি।

ও ভাই আকাশ মোদের ছত্র ধরে
বাতাস মোদের বাতাস করে রে।
আমরা সলিল অনিল নীল গগনে
বেড়াই পরান মেলে।
এবার উঠব রে সব ঠেলে॥

হায় ভাই রে, মোদের ঠাঁই দিল না
আপন মাটির মায়ে
তাই জীবন মোদের ভেসে বেড়ায়
ঝড়ের মুখে নায়ে।

ও ভাই নিত্য-নূতন হুকুম জারি
করছে তাই সব অত্যাচারী রে,
তারা বাজের মতন ছোঁ মেরে খায়
আমরা মৎস্য পেলে।

BANGLADARSHAN.COM

এবার উঠব রে সব ঠেলে॥

আমরা তল করেছি কতই সে ভাই
অথই নদীর জল,
ও ভাই হাজার করেও ওই হুজুরদের
পাইনে মনের তল।

আমরা অতল জলের তলা থেকে
রোহিত-মৃগেল আনি ছেকে রে,
এবার দৈত্য-দানব ধরব রে ভাই
ডাঙাতে জাল ফেলে।

এবার উঠব রে সব ঠেলে॥

আমরা পাথর-জলে ডুব-সাঁতার দিই
মরেও নাহি মরি,
আমরা হাঙর-কুমির-তিমির সাথে
নিত্য বসত করি।

ও ভাই জলের কুমির জয় করে কি
কুমির হল ঘরের ঢেঁকি রে,
ও ভাই মানুষ হতে কুমির ভালো
খায় না কাছে পেলে।

এবার উঠব রে সব ঠেলে॥

ও ভাই আমরা জলে জাল ফেলে রই,
হোথা ডাঙার পরে
আজ জাল ফেলেছে জালিম যত
জমাদারের চরে।

ও ভাই ডাঙার বাঘ ওই মানুষ-দেশে
ছেলে-মেয়ে ফেলে এসে রে,
আমরা বুকের আগুন নিবাই রে ভাই,
নয়ন-সলিল ঠেলে।

এবার উঠব রে সব ঠেলে॥

ও ভাই সপ্ত লক্ষ শির মোদের ভাই
চৌদ্দ লক্ষ বাহু,

BANGLADARSHAN.COM

ওরে গ্রাস করেছে তাদের ভাই আজ
 চৌদ্দজনা রাহ।

যে চৌদ্দ লক্ষ হাত দিয়ে ভাই
 সাগর মথে দাঁড় টেনে যাই রে,
সেই দাঁড় নিয়ে আজ দাঁড়া দেখি
 মায়ের সাত লাখ ছেলে।

এবার উঠব রে সব ঠেলে॥

ও ভাই আমরা জলের জল-দেবতা
 বরণ মোদের মিতা,
মোদের মৎস্যগন্ধার ছেলে ব্যাসদেব
 গাইল ভারত-গীতা।

আমরা দাঁড়ের ঘায়ে পায়ের তলে
 জলতরঙ্গ বাজাই জলে রে,
আমরা জলের মতন জল কেটে যাই,
 কাটব দানব পেলে
এবার উঠব রে সব ঠেলে॥

আমরা খেপলা জাল আর ফেলব না ভাই,
 একলা নদীর তীরে,
আয় এক সাথে ভাই সাত লাখে জেলে
 ধর বেড়াজাল ঘিরে।

ওই চৌদ্দ লক্ষ দাঁড় কাঁধে ভাই
 মল্লভূমির মল্ল-বীর আয়রে,
ওই আঁশ-বটিতে মাছ কাটি ভাই,
 কাটব অসুর এলে !
এবার উঠব রে সব ঠেলে॥

ছাত্রদলের গান

আমরা শক্তি আমরা বল
আমরা ছাত্রদল।
মোদের পায়ের তলায় মূর্ছে তুফান
উর্ধ্ব বিমান ঝড়-বাদল।
আমরা ছাত্রদল॥
মোদের আঁধার রাতে বাধার পথে
যাত্রা নাঙ্গা পায়,
আমরা শক্ত মাটি রক্তে রাঙাই
বিষম চলার ঘায় !
যুগে-যুগে রক্তে মোদের
সিদ্ধ হ'ল পৃথ্বীতল !
আমরা ছাত্রদল॥

মোদের কক্ষচ্যুত ধুমকেতু-প্রায়
লক্ষহারা প্রাণ,
আমরা ভাগ্যদেবীর যজ্ঞবেদীর
নিত্য বলিদান।
যখন লক্ষ্মীদেবী স্বর্গে ওঠেন,
আমরা পশি নীল অতল,
আমরা ছাত্রদল॥

আমরা ধরি মৃত্যু-রাজার
যজ্ঞ-ঘোড়ার রাশ
মোদের মৃত্যু লেখে মোদের
জীবন-ইতিহাস !
হাসির দেশে আমরা আনি
সর্বনাশি চোখের জল।
আমরা ছাত্রদল॥

সবাই যখন বুদ্ধি যোগায়,
আমরা করি ভুল।

সাবধানীরা বাঁধ বাঁধে সব,
আমরা ভাঙি কূল।
দারুণ রাতে আমরা তরুণ
রক্তে করি পথ পিছল !
আমরা ছাত্রদল ॥

মোদের চক্ষে জ্বলে জ্ঞানের মশাল
বক্ষে ভরা বাক,
কণ্ঠে মোদের কুণ্ঠ বিহীন
নিত্য কালের ডাক।

আমরা তাজা খুনে লাল ক'রেছি
সরস্বতীর শ্বেত কমল।
আমরা ছাত্রদল ॥

ঐ দারুণ উপপ্লাবের দিনে
আমরা দানি শির,
মোদের মাঝে মুক্তি কাঁদে
বিংশ শতাব্দীর !
মোরা গৌরবেরি কান্না দিয়ে
ভ'রেছি মা'র শ্যাম আঁচল।
আমরা ছাত্রদল ॥

আমরা রচি ভালোবাসার
আশার ভবিষ্যৎ
মোদের স্বর্গ-পথের আভাস দেখায়
আকাশ-ছায়াপথ !
মোদের চোখে বিশ্ববাসীর
স্বপ্ন দেখা হোক সফল।
আমরা ছাত্রদল ॥

কাণ্ডারী হুশিয়ার !

১

দুর্গম গিরি কান্তার-মরু দুস্তর পারাবার
লজ্জিতে হবে রাত্রি নিশীথে যাত্রিরা হুশিয়ার !

দুলিতেছে তরী, ফুলিতেছে জল, ভুলিতেছে মাঝি পথ,
ছিঁড়িয়াছে পাল, কে ধরিবে হাল, আছে কার হিম্মৎ ?
কে আছ জোয়ান, হও আণ্ডয়ান, হাঁকিছে ভবিষ্যৎ।
এ তুফান ভারী, দিতে হবে পাড়ি, নিতে হবে তরী পার।

২

তিমির রাত্রি, মাতৃমন্ত্রী সান্ত্রীরা সাবধান !
যুগ-যুগান্ত সঞ্চিত ব্যথা ঘোষিয়াছে অভিযান !
ফেনাইয়া উঠে বঞ্চিত বৃকে পুঞ্জিত অভিমান,
ইহাদের পথে, নিতে হবে সাথে, দিতে হবে অধিকার।

৩

অসহায় জাতি মরিছে ডুবিয়া, জানেনা সন্তরণ,
কাণ্ডারী ! আজ দেখিব তোমার মাতৃমুক্তিপণ !
“হিন্দু না ওরা মুসলিম ?” ওই জিজ্ঞাসে কোন জন ?
কাণ্ডারী ! বল ডুবিছে মানুষ, সন্তান মোর মা’র !

৪

গিরি-সংকট, ভীরু যাত্রীরা, গুরু গরজায় বাজ,
পশ্চাৎ-পথ-যাত্রীর মনে সন্দেহ জাগে আজ
কাণ্ডারী ! তুমি ভুলিবে কি পথ ? ত্যজিবে কি পথ-মাঝ ?
‘করে হানাহানি, তবু চল টানি’, নিয়াছ যে মহাভার !

৫

কাণ্ডারী ! তব সম্মুখে ঐ পলাশীর প্রান্তর,
বাস্তালীর খুলে লাল হ’ল যেথা ক্লাইভের খঞ্জর !

ঐ গঙ্গায় ডুবিয়েছে হায়, ভারতের দিবাকর
উদিবে সে রবি আমাদেরি খুনে রাঙিয়া পুনর্বীর।

৬

ফাঁসির মঞ্চে যারা গেয়ে গেল জীবনের জয়গান,
আসি' অলক্ষ্যে দাঁড়ায়েছে তারা, দিবে কোন বলিদান ?
আজি পরীক্ষা জাতির অথবা জাতের করিবে ত্রান ?
দুলিতেছে তরী, ফুলিতেছে জল, কাণ্ডারী হুঁশিয়ার !

কৃষ্ণনগর

৬ই জ্যৈষ্ঠ, ১৩৩৩

BANGLADARSHAN.COM

ফরিয়াদ

১

এই ধরণীর ধূলি-মাখা তব অসহায় সন্তান
মাগে প্রতিকার, উত্তর দাও, আদি-পিতা ভগবান !-
আমার আঁখির দুখ-দীপ নিয়া
বেড়াই তোমার সৃষ্টি ব্যাপিয়া,
যতটুকু হেরি বিস্ময়ে মরি, ভ'রে ওঠে সারা প্রাণ !
এত ভালো তুমি ? এত ভালোবাসা ? এত তুমি মহীয়ান ?
ভগবান্ ! ভগবান্ !

২

তোমার সৃষ্টি কত সুন্দর, কত সে মহৎ, পিতা !
সৃষ্টি-শিয়রে ব'সে কাঁদ তবু জননীর মতো ভীতা !
নাহি সোয়াস্তি-নাহি যেন সুখ,
ভেঙে গড়ো, গড়ে ভাঙো, উৎসুক !
আকাশ মুড়েছ মরকতে-পাছে আঁখি হয় রোদে ম্লান।
তোমার পবন করিছে বীজন জুড়াতে দক্ষ প্রাণ !
ভগবান্ ! ভগবান্ !

৩

রবি শশী তারা প্রভাত-সন্ধ্যা তোমার আদেশ কহে-
'এই দিবা রাত্তি আকাশ বাতাস নহে একা কারো নহে।
এই ধরণীর যাহা সম্বল,-
বাসে-ভরা ফুল, রসে-ভরা ফল,
সু-স্নিগ্ধ মাটি, সুধাসম জল, পাখীর কণ্ঠে গান,-
সকলের এতে সম অধিকার, এই তাঁর ফরমান !'
ভগবান্ ! ভগবান্ !

৪

শ্বেত পীত কালো করিয়া সৃজিলে মানবে, সে তব সাধ।
আমরা যে কালো, তুমি ভালো জান, নহে তাহা অপরাধ !

তুমি বল নাই, শুধু শ্বেতদ্বীপে
জোগাইবে আলো রবি-শশী-দীপে,
সাদা র'বে সবাকার টুটি টিপে, এ নহে তব বিধান।
সন্তান তব করিতেছে আজ তোমার অসম্মান !
ভগবান্ ! ভগবান্ !

৫

তব কনিষ্ঠ মেয়ে ধরণীরে দিলে দান ধুলা-মাটি,
তাই দিয়ে তার ছেলেদের মুখে ধরে সে দুধের বাটি !
ময়ূরের মত কলাপ মেলিয়া
তার আনন্দে বেড়ায় খেলিয়া—
সন্তান তার সুখী নয়, তারা লোভী, তারা শয়তান !
ঈর্ষায় মাতি' করে কাটাকাটি, রচে নিতি ব্যবধান !
ভগবান্ ! ভগবান্ !

৬

তোমারে ঠেলিয়া তোমার আসনে বসিয়াছে আজ লোভী,
রসনা তাহার শ্যামল ধরায় করিছে সাহারা গোবী !
মাটির চিবিতে দু'দিন বসিয়া
রাজা সেজে করে পেষণ কষিয়া !
সে পেষণে তারি আসন ধসিয়া রচিছে গোরস্থান !
ভাই-এর মুখের গ্রাস কেড়ে খেয়ে বীরের আখ্যা পান !
ভগবান্ ! ভগবান্ !

৭

জনগণে যারা জেঁক সম শোষে তারে মহাজন কয়,
সন্তান সম পালে যারা জমি, তারা জমিদার নয়।
মাটিতে যাদের ঠেকে না চরণ,
মাটির মালিক তাঁহরাই হন—
যে যত ভণ্ড ধড়িবাজ আজ সেই তত বলবান।
নিতি নব ছোরা গড়িয়া কসাই বলে জ্ঞান-বিজ্ঞান।
ভগবান্ ! ভগবান্ !

অন্যায় রণে যারা যত দড় তারা তত বড় জাতি,
 সাত মহারথী শিশুরে বধিয়া ফুলায় বেহায়া ছাতি !
 তোমার চক্র রুধিয়াছে আজ
 বেনের রৌপ্য-চাকায়, কি লাজ !
 এত অনাচার স'য়ে যাও তুমি, তুমি মহা মহীয়ান।
 পীড়িত মানব পারে না ক' আর, সবে না এ অপমান—
 ভগবান্ ! ভগবান্ !

ঐ দিকে দিকে বেজেছে ডঙ্কা শঙ্কা নাহি ক' আর !
 'মরিয়া'র মুখে মারণের বাণী উঠিতেছে 'মার মার !'
 রক্ত যা ছিল ক'রেছে শোষণ,
 নীরক্ত দেহে হাড় দিয়ে রণ !
 শত শতাব্দী ভাঙেনি যে হাড়, সেই হাড়ে ওঠে গান—
 'জয় নিপীড়িত জনগণ জয় ! জয় নব উত্থান !
 জয় জয় ভগবান !'

তোমার দেওয়া এ বিপুল পৃথ্বী সকলে করিব ভোগ,
 এই পৃথিবীর নাড়ী সাথে আছে সৃজন-দিনের যোগ।
 তাজা ফুল ফলে অঞ্চলি পুরে
 বেড়ায় ধরণী প্রতি ঘরে ঘরে,
 কে আছে এমন ডাকু যে হরিবে আমার গোলার ধান ?
 আমার ক্ষুধার অন্তে পেয়েছি আমার প্রাণের ঘ্রাণ—
 এতদিনে ভগবান !

যে-আকাশে হ'তে ঝড়ে তব দান আলো ও বৃষ্টি-ধারা,
 সে-আকাশ হ'তে বেলুন উড়ায় গোলাগুলি হানে কা'রা ?
 উদার আকাশ বাতাস কাহারা
 করিয়া তুলিছে ভীতির সাহারা ?

তোমার অসীম ঘিরিয়া পাহারা দিতেছে কা'র কামান ?
হবে না সত্য দৈত্য-মুক্ত ? হবে না প্রতিবিধান ?
ভগবান ! ভগবান !

১২

তোমার দত্ত হস্তেরে বাঁধে কোন্ নিপীড়ন-চেড়ী ?
আমার স্বাধীন বিচরণ রোধে কার আইনের বেড়ী ?
ক্ষুধা তৃষা আছে, আছে মোর প্রাণ,
আমিও মানুষ, আমিও মহান !
আমার অধীনে এ মোর রসনা, এই খাড়া গর্দান !
মনের শিকল ছিঁড়েছি, পড়েছে হাতের শিকলে টান—
এতদিনে ভগবান !

১৩

চির-অবনত তুলিয়াছে আজ গগনে উচ্চ শির।
বান্দা আজিকে বন্দক ছেদি' ভেঙেছে কারা-প্রাচীর।
এতদিনে তার লাগিয়াছে ভালো—
আকাশ বাতাস বাহিরেতে আলো,
এবার বন্দী বুঝেছে, মধুর প্রাণের চাইতে ত্রাণ।
মুক্ত-কণ্ঠে স্বাধীন বিশ্বে উঠিতেছে একতান—
জয় নিপীড়িত প্রাণ !
জয় নব অভিযান !
জয় নব উত্থান !

হুগলী

৭ আশ্বিন, ১৩৩২

আমার কৈফিয়ৎ

১

বর্তমানের কবি আমি ভাই, ভবিষ্যতের নই ‘নবী’,
কবি ও অকবি যাহা বলো মোরে মুখ বুঁজে তাই সবি !
কেহ বলে, ‘তুমি ভবিষ্যতে যে
ঠাই পাবে কবি ভবীর সাথে হে !
যেমন বেরোয় রবির হাতে সে চিরকালে-বাণী কই কবি ?’
দুষ্টিছে সবাই, আমি তবু গাই শুধু প্রভাতের ভৈরবী !

২

কবি বন্ধুরা হতাশ হইয়া মোর লেখা প’ড়ে শ্বাস ফেলে !
বলে, কেজো ক্রমে হচ্ছে অকেজো পলিটিক্সের পাশ ঠেলে।
পড়ে না ক’ বই, ব’য়ে গেছে ওটা।
কেহ বলে, বৌ-এ গিলিয়াছে গোটা।
কেহ বলে, মাটি হ’ল হয়ে মোটা জেলে ব’সে শুধু তাস খেলে !
কেহ বলে, তুই জেলে ছিলি ভালো ফের যেন তুই যাস জেলে !

৩

গুরু ক’ন, তুই করেছিস গুরু তলোয়ার দিয়ে দাড়ি চাঁছা !
প্রতি শনিবারী চিঠিতে প্রেয়সী গালি দেন, ‘তুমি হাড়িচাঁচা !’
আমি বলি, ‘প্রিয়ে, হাটে ভাঙি হাঁড়ি !’
অমনি বন্ধ চিঠি তাড়াতাড়ি।
সব ছেড়ে দিয়ে করিলাম বিয়ে, হিন্দুরা ক’ন, আড়ি চাচা !’
যবন না আমি কাফের ভাবিয়া খুঁজি টিকি দাড়ি, নাড়ি কাছা !

৪

মৌ-লোভী যত মৌলভী আর ‘মোল্-লা’রা ক’ন হাত নেড়ে’,
‘দেব-দেবী নাম মুখে আনে, সবে দাও পাজিটার জাত মেরে !
তোয়া দিলাম—কাফের কাজী ও,
যদিও শহীদ হইতে রাজী ও !

‘আমপাড়া’-পড়া হাম-বড়া মোরা এখনো বেড়াই ভাত মেরে !
হিন্দুরা ভাবে, ‘পার্শী’-শব্দে কবিতা লেখে, ও পা’ত-নেড়ে !’

৫

আনকোরা যত নন্ভায়োলেন্ট নন্-কো’র দলও নন্ খুশী।
‘ভায়োরেন্সের ভায়োলিন্’ নাকি আমি, বিপ্লবী-মন তুষ্টি।
‘এটা অহিংস’, বিপ্লবী ভাবে,
‘নয় চরকার গান কেন গা’বে ?’
গোঁড়া-রাম ভাবে নাস্তিক আমি, পাতি-রাম ভাবে কন্ফুসি !
স্বরাজীরা ভাবে নারাজী, নারাজীরা ভাবে তাহাদের আঙ্কুশি !

৬

নর ভাবে, আমি বড় নারী-ঘেঁষা ! নারী ভাবে, নারী-বিদ্বেষী !
‘বিলেত ফেরোনি ?’ প্রবাসী-বন্ধু ক’ন, ‘এই তব বিদ্যে, ছি !’
ভক্তরা বলে, ‘নবযুগ-রবি !’
যুগের না হই, হুজুগের কবি
বাটি ত রে দাদা, আমি মনে ভাবি, আর ক’ষে কষি হৃদ-পেশী,
দু’কানে চশমা আঁটিয়া ঘুমানু, দিব্যি হ’তেছে নিদ্ বেশী !

৭

কি যে লিখি ছাই মাথা ও মুণ্ডু আমিই কি বুঝি তার কিছু ?
হাত উঁচু আর হ’ল না ত ভাই, তাই লিখি ক’রে ঘাড় নীচু !
বন্ধু ! তোমরা দিলে না ক’ দাম,
রাজ-সরকার রেখেছেন মান !
যাহা কিছু লিখি অমূল্য ব’লে অ-মূল্যে নেন ! আর কিছু
গুনেছ কি, হুঁ হুঁ, ফিরিছে রাজার প্রহরী সদাই কার পিছু ?
বন্ধু ! তুমি ত দেখেছ আমায় আমার মনের মন্দিরে,
হাড় কালি হ’ল শাসাতে নারিনু তবু পোড়া মন-বন্দীরে !
যতবার বাঁধি ছেঁড়ে সে শিকল,
মেরে মেরে তা’রে করিনু বিকল,
তবু যদি কথা শোনে সে পাগল ! মানিল না ররি-গাঙ্গীরে।
হঠাৎ জাগিয়া বাঘ খুঁজে ফেরে নিশার আঁধারে বন চিরে !

আমি বলি, ওরে কথা শোন্ ক্ষ্যাপা, দিব্যি আছিস্ খোশ্-হালে !
 প্রায় 'হাফ'-নেতা হ'য়ে উঠেছিস্, এবার এ দাঁও ফস্কালে
 'ফুল'-নেতা আর হবিনে যে হয় !
 বক্তৃতা দিয়া কাঁদিতে সভায়
 গুঁড়িয়ে লক্ষা পকেটেতে বোকা এই বেলা ঢোকা ! সেই তালে
 নিস্ তোর ফুটো ঘরটাও ছেয়ে, নয় পস্তাবি শেষকালে।

বোষে না ক' যে সে চরণের বেশে ফেরে দেশে দেশে গান গেয়ে,
 গান শুনে সবে ভাবে, ভাবনা কি ! দিন যাবে এবে পান খেয়ে !
 রবে না ক' ম্যালেরিয়া মহামারী,
 স্বরাজ আসিছে চ'ড়ে জুড়ি-গাড়ী,
 চাঁদা চাই, তারা ক্ষুধার অন্ন এনে দেয়, কাঁদে ছেলে-মেয়ে।
 মাতা কয়, ওরে চুপ্ হতভাগা, স্বরাজ আসে যে, দেখ্ চেয়ে !

ক্ষুধাতুর শিশু চায় না স্বরাজ, চায় দুটো ভাত, একটু নুন,
 বেলা ব'য়ে যায়, খায়নি ক' বাছা, কচি পেটে তার জ্বলে আগুন।
 কেঁদে ছুটে আসি পাগলের প্রায়,
 স্বরাজের নেশা কোথা ছুটে যায় !
 কেঁদে বলি, ওগো ভগবান তুমি আজিও আছে কি ? কালি ও চুন
 কেন ওঠে না ক' তাহাদের গালে, যারা খায় এই শিশুর খুন ?

আমরা ত জানি, স্বরাজ আনিতে পোড়া বার্তাকু এনেছি খাস !
 কত শত কোটি ক্ষুধিত শিশুর ক্ষুধা নিঙাড়িয়া কাড়িয়া গ্রাস
 এল কোটি টাকা, এল না স্বরাজ !
 টাকা দিতে নারে ভুখারি সমাজ।
 মা'র বুক হ'তে ছেলে কেড়ে খায়, মোরা বলি, বাঘ, খাও হে ঘাস !
 হেরিনু, জননী মাগিছে ভিক্ষা ঢেকে রেখে ঘরে ছেলের লাশ !

বন্ধু গো, আর বলিতে পারি না, বড় বিষ-জ্বালা এই বুকে !
 দেখিয়া শুনিয়া ক্ষেপিয়া গিয়াছি, তাই যাহা আসে কই মুখে।
 রক্ত ঝরাতে পারি না ত একা,
 তাই লিখে যাই এ রক্ত-লেখা,
 বড় কথা বড় ভাব আসে না ক' মাথায়, বন্ধু, বড় দুঃখে !
 অমর কাব্য তোমরা লিখিও, বন্ধু, যাহারা আছ সুখে !

পরোয়া করি না, বাঁচি বা না-বাঁচি যুগের হুজুগ কেটে গেলে,
 মাথার উপরে জ্বলিছেন রবি, রয়েছে সোনার শত ছেলে।
 প্রার্থনা ক'রো যারা কেড়ে খায় তেত্রিশ কোটি মুখের গ্রাস,
 যেন লেখা হয় আমার রক্ত-লেখায় তাদের সর্বনাশ !

প্রার্থনা

[গান]

এসো যুগ-সারথি নিঃশঙ্ক নির্ভয়।

এসো চির-সুন্দর অভেদ অসংশয়।

জয় জয়।

জয় জয়।

এসো বীর অনাগত

বজ্র-সমুদ্যত।

এসো অপরাজেয় উদ্ধত নির্দয়।

জয় জয়।

জয় জয়।

হে মৌনী জন-গণ—

বেদনা-বিমোচন—

যুগ-সেনানায়ক ! জাগো জ্যোতির্ময়।

জয় জয়।

জয় জয়।

ওঠে ক্রন্দন ওই,

এসো বন্ধন-জয়ী।

জাগে শিশু, মাগে আলো, এসো অরণোদয়।

জয় জয়।

জয় জয়।

কলিকাতা

১ আশ্বিন ১৩৩২

গোকুল নাগ

না ফুরাতে শরতের বিদায়-শেফালি,
না নিবিতে আশ্বিনের কমল-দীপালি,
তুমি শুনেছিলে বন্ধু পাতা-ঝরা গান
ফুলে ফুলে হেমন্তের বিদায়-আহ্বান !

অতন্দ্র নয়নে তব লেগেছিল চুম
ঝর-ঝর কামিনীর, এল চোখে ঘুম
রাত্রিময়ী রহস্যের ; ছিন্ন শতদল
হ'ল তব পথ-সাথী ; হিমালী-সজল
ছায়াপথ-বিথী দিয়া শেফালি দলিয়া
এল তব মায়া বধু ব্যথা-জাগানিয়া !

এল অশ্রু হেমন্তের, এল ফুল-খসা
শিশির-তিমির-রাত্রি ; শ্রান্ত দীর্ঘশ্বসা
ঝাউ-শাখে সিক্ত বায়ু ছায়া-কুহেলির
অশ্রু-ঘন মায়া-আঁখি, বিরহ-অথির
বুকে তব ব্যথা-কীট পশিল সেদিন !

যে-কাল্লা এল না চোখে, মর্মে হ'ল লীন,
বক্ষে তাহা নিল বাসা, হ'ল রক্তে রাঙা
আশাহীন ভালবাসা, ভাষা অশ্রু-ভাঙা !

বন্ধু, তব জীবনের কুমারী আশ্বিন
পরিল বিধবা বেশ করে কোন্ দিন,
কোন্ দিন সঁউতির মালা হ'তে তার
ঝ'রে গেল বৃত্তগুলি রাঙা কামনার-
জানি নাই, জানি নাই, তোমার জীবনে
হাসিছে বিচ্ছেদ-রাত্রি, অজানা গহনে
এবে যাত্রা শুরু তব, হে পথ-উদাসী !
কোন্ বনান্তর হ'তে ঘর-ছাড়া বাঁশী
ডাল দিল, তুমি জান। মোরা শুধু জানি

তব পায়ে কেঁদেছিল সারা পথখানি !
সেধেছিল, ঐঁকেছিল ধূলি-তুলি দিয়া
তোমার পদাঙ্ক-স্মৃতি।

রহিয়া রহিয়া

কত কথা মনে পড়ে ! আজ তুমি নাই,
মোরা তব পায়ে-চলা পথে শুধু তাই
এসেছি খুঁজিতে সেই তপ্ত পদ-রেখা,
এইখানে আছে তব ইতিহাস লেখা।

জানি না ক' আজ তুমি কোন্ লোকে রহি'
শুনিছ আমার গান হে কবি বিরহী !

কোথা কোন্ জিজ্ঞাসার অসীম সাহারা,
প্রতীক্ষার চির-রাত্রি, চন্দ্র, সূর্য, তারা,
পারায়ে চলেছ একা অসীম বিরহে ?

তব পথ-সাথী যারা-পিছু ডাকি' কহে,

‘ওগো বন্ধু শেফালির, শিশিরের প্রিয় !

তব যাত্রা-পথে আজ নিও বন্ধু নিও
আমাদের অশ্রু-আর্দ্র এ স্মরণখানি !’

শুনিতে পাও কি তুমি, এ-পারে ও-পারে ?

এ কাহার শব্দ শুনি মনের বেতারে ?

কতদূরে আছ তুমি কোথা কোন্ বেষে ?

লোকান্তরে, না সে এই হৃদয়েরি দেশে

পারায়ে নয়ন-সীমা বাঁধিয়াছ বাসা ?

হৃদয়ে বসিয়া শোন হৃদয়ের ভাষা ?

হারায়নি এত সূর্য এত চন্দ্র তারা,

যেথা হোক আছ বন্ধু, হওনি ক' হারা !...

সেই পথ, সেই পথ-চলা গাঢ় স্মৃতি,

সব আছে ! নাই শুধু সেই নিতি নিতি

নব নব ভালোবাসা প্রতি দরশনে,

আরো প্রিয় ক'রে পাওয়া চির প্রিয়জনে-

আদি নাই, অন্ত নাই, ক্লান্তি তৃপ্তি নাই-

যত চাই তত চাই-আরো আরো চাই,-

BANGLADARSHAN.COM

সেই নেশা, সেই মধু নাড়ী-ছেঁড়া টান
সেই কল্পলোকে নব নব অভিযান,-
সব নিয়ে গেছ বন্ধু ! সে কল-কল্লোল,
সে হাসি-হিল্লোল নাই চিত-উতরোল !
আজ সেই প্রাণ-ঠাসা একমুঠো ঘরে
শূন্যের শূন্যতা রাজে, বুক নাহি ভরে !...

হে নবীন, অফুরন্ত তব প্রাণ-ধারা।
হয়ত এ মরু-পথে হয়নি ক' হারা,
হয়ত আবার তুমি নব পরিচয়ে
দেবে ধরা ; হবে ধন্য তব দান ল'য়ে
কথা-সরস্বতী ! তাহা ল'য়ে ব্যথা নয়,
কত বাণী এল, গেল, কত হ'ল লয়,
আবার আসিবে কত। শুধু মনে হয়
তোমারে আমরা চাই, রক্তমাংসময় !
আপনারে ক্ষয় করি' যে অক্ষয় বাণী
আনিলে আনন্দ-বীর, নিজে বীণাপাণি
পাতি' কর লবে তাহা, তবু যেন হয়,
হৃদয়ের কোথা কোন্ ব্যথা থেকে যায় !
কোথা যেন শূন্যতার নিঃশব্দ ক্রন্দন
গুমরি' গুমরি' ফেরে, হু-হু করে মন !

বাণী তব-তব দান-সে তা সকলের,
ব্যথা সেথা নয় বন্ধু ! যে ক্ষতি একের
সেথায় সান্ত্বনা কোথা ? সেথা শান্তি নাই,
মোরা হারিয়েছি,-বন্ধু, সখা, প্রিয় ভাই।...
কবির আনন্দ-লোকে নাই দুঃখ-শোক,
সে-লোকে বিরহে যারা তারা সুখী হোক !
তুমি শিল্পী তুমি কবি দেখিয়াছে তারা,
তারা পান করে নাই তব প্রাণ-ধারা !

‘পথিকে’ দেখেছে তা’রা, দেখেনি ‘গোকুলে’,
ডুবেনি ক’-সুখী তারা-আজো তা’রা কূলে !

BANGLADARSHAN.COM

আজো মোরা প্রাণাচ্ছন্ন, আমরা জানি না
গোকুল সে শিল্পী গল্পী কবি ছিল কি-না !

আত্মীয়ে স্মরিয়া কাঁদি, কাঁদি প্রিয় তরে
গোকুলে পড়েছে মনে-তাই অশ্রু ঝরে !

না ফুরাতে আশা ভাষা, না মিটিতে ক্ষুধা,
না ফুরাতে ধরণীর মৃৎ-পাত্র-সুধা,
মধ্যাহ্নে আসিল দূত ! যত তৃষ্ণা সাধ
কাঁদিল আঁকড়ি' ধরা, যেতে নাহি চায় !
ছেড়ে যেতে যেন সব স্নায়ু ছিঁড়ে যায় !
ধরার নাড়ীতে পড়ে টান ! তরুলতা
জল বায়ু মাটি সব কয় যেন কথা !
যেয়ো না ক' যেয়ো না ক' যেন সব বলে-
তাই এত আকর্ষণ এই জলে স্থলে
অনুভব করেছিলে প্রকৃতি-দুলাল !
ছেড়ে যেতে ছিঁড়ে গেল বক্ষ, লালে লাল
হ'ল ছিন্ন প্রাণ ! বন্ধু, সেই রক্ত ব্যথা
র'য়ে গেল আমাদের বুকে চেপে হেথা !

হে তরুণ, হে অরুণ, হে শিল্পী সুন্দর,
মধ্যাহ্নে আসিয়াছিল সুমেরু-শিখর
কৈলাসের কাছাকাছি দারুণ তৃষ্ণায়,
পেলে দেখা সুন্দরের, স্বরগ-গঙ্গায়
হয়ত মিটেছে তৃষ্ণা, হয়ত আবার
ক্ষুধাতুর !-স্রোতে ভেসে এসেছে এ-পার
অথবা হয়ত আজ হে ব্যথা-সাধক,
অশ্রু-সরস্বতী কর্ণে তুমি কুরুবক !

হে পথিক-বন্ধু মোর, হে প্রিয় আমার,
যেখানে যে লোকে থাক করিও স্বীকার
অশ্রু-রেবা-কূলে মোর স্মৃতি-তর্পণ,
তোমারে অঞ্জলি করি' করিনু অর্পণ !

সুন্দরের তপস্যায় ধ্যানে আত্মহারা
দারিদ্র্যে দর্প তেজ নিয়া এল যারা,
যারা চির-সর্বহারা করি' আত্মদান,
যাহারা সৃজন করে, করে না নির্মাণ,
সেই বাণীপুত্রদের আড়ম্বরহীন
এ-সহজ আয়োজন এ-স্মরণ-দিন
স্বীকার করিও কবি, যেমন স্বীকার
ক'রেছিলে তাহাদের জীবনে তোমার !

নহে এরা অভিনেতা, দেশ-নেতা নহে,
এদের সৃজন-কুঞ্জ অভাবে, বিরহে,
ইহাদের বিত্ত নাই, পুঁজি চিত্তদল,
নাই বড় আয়োজন, নাই কোলাহল ;
আছে অশ্রু, আছে প্রীতি, আছে বক্ষ-ক্ষত,
তাই নিয়ে সুখী হও, বন্ধু স্বর্গগত !

গড়ে যারা, যারা করে প্রাসাদ নির্মাণ
শিরোপা তাদের তরে, তাদের সম্মাণ।
দু'দিনে ওদের গড়া প'ড়ে ভেঙে যায়

কিন্তু স্রষ্টা সম যারা গোপনে কোথায়
সৃজন করিছে জাতি, সৃজিছে মানুষ
অচেনা রহিল তা'রা। কথার ফানুস
ফাঁপাইয়া যারা যত করে বাহাদুরী,
তারা তত পাবে মালা যমের কস্তুরী !

‘আজ’টাই সত্য নয়, ক’টা দিন তাহা ?
ইতিহাস আছে, আছে ভবিষ্যৎ যাহা
অনন্ত কালের তরে রচে সিংহাসন,
সেখানে বসাবে তোমা বিশ্বজনগণ।
আজ তারা নয় বন্ধু, হবে সে তখন,—
পূজা নয়—আজ শুধু করিনু স্মরণ।

কুলি-মজুর

দেখিনু সেদিন রেলের,
কুলি ব'লে এক বাবু সা'ব তারে ঠেলে দিলে নীচে ফেলে !
চোখ ফেটে এল জল,
এমনি ক'রে কি জগৎ জুড়িয়া মার খাবে দুর্বল ?
যে দধীচিদের হাড় দিয়ে ঐ বাষ্প-শকট চলে,
বাবু সা'ব এসে চড়িল তাহাতে, কুলিরা পড়িল তলে।
বেতন দিয়াছ ?—চুপ রও যত মিথ্যাবাদীর দল !
কত পাই দিয়ে কুলিদের তুই কত ক্রোর পেলি বল ?
রাজপথে তব চলিছে মোটর, সাগরে জাহাজ চলে,
রেলপথে চলে বাষ্প-শকট, দেশ ছেয়ে গেল কলে,
বল ত এসব কাহাদের দান ! তোমার অট্টালিকা
কার খুনে রাঙা ?—ঠুলি খুলে দেখ, প্রতি হঁটে আছে লিখা।
তুমি জান না ক', কিন্তু পথের প্রতি ধূলিকণা জানে,
ঐ পথ, ঐ জাহাজ, শকট, অট্টালিকার মানে !
আসিতেছে শুভদিন,
দিনে দিনে বহু বাড়িয়াছে দেনা শুধিতে হইবে ঋণ !
হাতুড়ি শাবল গাঁইতি চালায়ে ভাঙিল যারা পাহাড়,
পাহাড়-কাটা সে পথের দু'পাশে পড়িয়া যাদের হাড়,
তোমারে সেবিত হইল যাহারা মজুর, মুটে ও কুলি,
তোমারে বহিতে যারা পবিত্র অঙ্গে লাগাল ধূলি ;
তারাই মানুষ, তারাই দেবতা, গাহি তাহাদেরি গান,
তাদেরি ব্যথিত বক্ষে পা ফেলে আসে নব উত্থান !
তুমি শুয়ে র'বে তেতালার পরে আমরা রহিব নীচে,
অথচ তোমারে দেবতা বলিব, সে ভরসা আজ মিছে !
সিক্ত যাদের সারা দেহ-মন মাটির মমতা-রসে
এই ধরণীর তরণীর হাল রবে তাহাদেরি বশে !
তারি পদরজ অঞ্জলি করি' মাথায় লইব তুলি',
সকলের সাথে পথে চলি' যায় পায়ে লাগিয়াছে ধূলি !
আজ নিখিলের বেদনা-আর্ত পীড়িতের মাখি' খুন,
লালে লাল হ'য়ে উদিছে নবীন প্রভাতের নবারুণ !

আজ হৃদয়ের জমা-ধরা যত কবাট ভাঙিয়া দাও,
রঙ-করা ঐ চামড়ার যত আবরণ খুলে নাও !
আকাশের আজ যত বায়ু আছে হইয়া জমাট নীল,
মাতামাতি ক'রে ঢুকুক এ বুক, খুলে দাও যত খিল !
সকল আকাশ ভাঙিয়া পড়-ক আমাদের এই ঘরে,
মোদের মাথায় চন্দ্র সূর্য তারারা পড়-ক ঝড়ে।
সকল কালের সকল দেশের সকল মানুষ আসি'
এক মোহনায় দাঁড়াইয়া শোনে এক মিলনের বাঁশী।
একজনে দিলে ব্যথা—
সমান হইয়া বাজে সে বেদনা সকলের বুক হেথা।
একের অসম্মান
নিখিল মানব-জাতির লজ্জা-সকলের অপমান !
মহা-মানবের মহা-বেদনার আজি মহা-উত্থান,
উর্ধ্ব হসিছে ভগবান, নীচে কাঁপিতেছে শয়তান !

BANGLADARSHAN.COM

মা (বিরজাসুন্দরী দেবী)-র

শ্রীচরণারবিন্দে

সর্বসহা সর্বহারা জননী আমার।
তুমি কোনদিন কারো করনি বিচার,
কারেও দাওনি দোষ। ব্যথা বারিধির
কূলে ব'সে কাঁদ' মৌনা কন্যা ধরণীর
একাকিনী ! যেন কোন্ পথ-ভুলে-আসা
ভিন্-গাঁ'র ভীৰু" মেয়ে ! কেবলি জিজ্ঞাসা
করিতেছে আপনারে, 'এ আমি কোথায় ?'
দূর হ'তে তারাকারা ডাকে, আয় আয় !
তুমি যেন তাহাদের পলাতকা মেয়ে
ভুলিয়া এসেছ হেথা ছায়া-পথ বেয়ে !
বিধি ও অবিধি মিলে মেরেছে তোমায়
মা আমার-কত যেন ! চোখে-মুখে, হায়
তবু যেন শুধু এক ব্যথিত জিজ্ঞাসা-
'কেন মানে ? এরা কা'রা ! কোথা হ'তে আসে
এই দুঃখ ব্যথা শোক ?' এরা তো তোমার
নহে পরিচিত মাগো, কন্যা অলকার !
তাই সব স'য়ে যাও নির্বাক নিশ্চুপ,
ধূপেরে পোড়ায় অগ্নি-জানে না তা ধূপ !...
দূর-দূরান্তর হ'তে আসে ছেলে-মেয়ে,
ভুলে যায় খেলা তা'রা তব মুখ চেয়ে !
বলে, 'তুমি মা হবে আমার ?' ভেবে কী যে !
তুমি বুকে চেপে ধর, চক্ষু ওঠে ভিজ
জননীর করুণায় ! মনে হয় যেন
সকলের চেনা তুমি, সকলেরে চেন !
তোমারি দেশের যেন ওরা ঘরছাড়া
বেড়াতে এসেছে এই ধরণীর পাড়া
প্রবাসী শিশুর দল। যাবে ওরা চ'লে

গলা ধরে দুটি কথা 'মা আমার' বলে !
হয়ত আসিয়াছিল, যদি পড়ে মনে,
অথবা সে আসে নাই-না এলে স্মরণে !
যে-দুরন্ত গেছে চলে আসিবে না আর,
হয়ত তোমার বুকে গোরস্তান তার
জাগিতেছে আজি মৌন, অথবা সে নাই !
মন ত কত পাই-কত সে হারাই...
সর্বসহা কন্যা মোর ! সর্বহারা মাতা !
শূন্য নাহি রহে কভু মাতা ও বিধাতা।
হারা-বুকে আজ তব ফিরিয়াছে যারা—
হয়ত তাদেরি স্মৃতি এই 'সর্বহারা !'

BANGLADARSHAN.COM